

glia uno lontano dal campo de i nimici, qual era a presso Rivolta Secha, et haveno la terra avanti el zonzer nostro in quel lozamento, et perhò se alozassemo nel sopra scripto locho de Casira, per aspectar de trovar li inimici in desordine ne l' alozar over deslozar del campo suo. L'altra sera, a horre 3 de note, le scolte nostre ne feceno intender, che nel campo de i nimici si faceva remor assai, et erano per levar el campo, *tamen* non sapevemo a qual banda voleveno andar. Monstrono voler andar de sopra, et aviorno a quella banda certi cavalli, *tamen*, giudicando nui che l'horo facessero una fenctione, et voleveno venir a la volta i veneno, fu comandà, che tutto il campo stessee in arme a li sui alozamenti, et come intendevemo la via certa che fevano li inimici, aviarse ancora nui a la sua volta. A l'alba intendesemo el campo suo venir a questa volta; et cussi *immediate* se aviasemo ancora nui, con le bataglie nostre de fantaria et zente d'arme partide in 4 colomeli et l'artelaria in mezo. Havevemo gran manchamento de guastadori de far le spianade, per esserne fuzidi molli. Andando con questo ordine, et havendo mandà tutti li chariazzi a la volta de Charavazo per altra via, caminato zercha un mio, intendesemo el campo de i nimici far altro; e cussi ancor nui fessemo el simile. Stando per pocho spazio, intendesemo el campo suo continuar al camino, quale era discosto da nui miglia uno. Nui caminavemo sopra una riva de Adda assai alta, et l'horo per el basso, ma locho assai forte, per fossi et *etiam* qualche paludo, et perhò non giudicavemo i dovesse atacharse con nui, ma che i doveseno alozar a Pandin; et nui sollicitavemo el camino per torli lo alozamento et saltarli inanti. Stando cussi, certi cavali lizieri de li sui se spinseno a la volta nostra, zoè al retroguardo, dove era lo conte di Pitigliano et lo signor Piero dal Monte. El prefato conte mi mandò a dimandar 3 pezi de artelaria, io li mandai 2 sacri et 2 falconeti, qualli tirono alcuni colpi a la volta sua. Alcuni nostri cavali lizieri ancora se spinseno scaramuzando insieme; tutto el campo se afermò. Io me ritrovava a condur la artelaria per una roza, la qual cavasemo fora et la destendesemo, con consiglio del Citolo, ad una banda, che la tirava a li inimici per fiancho. La scaramuza tutta volta se ingrosava, le ordinanze mostravano star con bon hordine, et dove era el colonello nostro, eramo in grande avantazo per fantarie, perchè el ce era vigne assai et fossa. Deserasemo alcuni pezi de l'artelaria grossa; et da poi fato, li nimici se acostorono ancora l'horo alcuni pezi verso el colomelo del conte, el qual mi mandò a dimandar altri 4

137

pezi d'artelaria. Io stentava a mandargeli, perchè li caratieri nostri erano in paura et desordine; el magnifico missier Andrea Gritti venne im persona a rechiedermeli. Io me inviai *immediate* con pezi do, lasano (*sic*) ordine li altri do me vegniseno driedo. In questo *interim* li franzosi deserono alcuni colpi, per li qual li fanti et vilani se meseno in fuga; penseno *etiam* un squadron de homeni d'arme, d'onde li homeni d'arme nostri ancora lhor se meseno in fuga. Franzosi comenzavano a spontar per più bande. Io al calar de un passo, che li nostri erano mesedati con franzosi, fui urtato et batuto da cavalo, d'un bon cavalo, che fu de' franzosi, qual me havea donato el signor Bortolo; la celada, la qual per pressa non era alazada, me fuzi de testa, fume tirato una bota de lanza, la qual me azonse scarso ne la testa, et hame ferito, ma non haverò perhò troppo mal. Da poi fui ajutato da li stafieri et me n'andai un pezo per un fosso. Montato de sopra, ce era el signor Bortolo con un altro homo d'arme solamente, qual havea una spada in mano; et da ogni parte li franzosi cazavano et ferivano i nostri, che fuzivano. Uno regazo me vene a presso, li tolesemo el cavalo et montai suso, tirandome a una banda, dove vedefa menor furia, persuadendo a li nostri, che fuzivano, che doveseno voltare. Soprazonse el signor Raynier da la Saseta con alcuni de li sui, et me dice che non era tempo de star li, che eramo roti. Lo effecto è stà che se habiamo posto in fuga senza combater. Ne è stà ditto, che el capitano do over 3 volte volse spenzer li nostri homeni d'arme a l'incontro de i nimici et non potè haverne, salvo alcuni pochi. Le artelarie son certo siano rimaste in man de i nimici et cussi le monition; et pochi cavali de l'artelaria salvati, atendo a recuperarli. De li nostri, pochi sono stà feriti et morti, salvo el Zitolo da Perosa, Franchò dal Borgo et el signor Piero dal Monte et alcuni altri. Li capetanij tutti sono salvì; li cariazzi nostri, qualli erano andati a la volta di Caravazo, judico siano tutti perssi. El magnifico missier Zorzi Corner, se ritrovava ancor lui in quel locho, è andato a Chiari, dove se ritrova el capitano et el magnifico missier Andrea Gritti. In questa horra è stà dito certamente, per veduta, aritrovarsi *etiam* el signor Bortolo li. Atendeno a recuperar questa zente d'arme et questo exercito più che poseno, ma la artelaria male se potrà restaurar. Le zente d'arme sono tutte salve et cussi li cavali lizieri. De fantarie fo un bon modo de provedersi, *eo magis* havendo salvì quasi tutti li capitanei; sì che spero fra X zorni se haverà un exercito in hordine pocho inferior de questo. Io

138